

阿毗曇毗婆沙論卷第四

分四

迦旃延子造 比涼沙門浮陀跋摩共造奉譯

雜捷度世第一法品之四

云何頂法云何頂法退云何暖法乃至廣說
 問曰此中逆說凡夫所得法說世第一法已
 何以不次說忍耶答曰或有說者彼作經者
 意欲示乃至廣說復有說者應說云何為忍
 以何等故名忍當云何繫乃至廣說而不說
 者有何意耶答曰此是有餘之說簡略之義
 復有說者先已說忍而不彰顯如先說若後
 心心數法勝者前者則非世第一法為是何
 耶答曰增上忍是名說忍復有說者若佛經
 說此中便說若經不說此中不說佛經無說
 忍處是故不說說曰如增一阿含中說若不
 成就六法則不能遠塵離垢得法眼淨云何
 為六一不樂聞法二雖聞法不攝耳聽三不
 為知解四所未得法不方便勤求五所得法
 不善守護六不成就順忍若成就六法則能

遠塵離垢得法眼淨云何為六喜樂聞法乃
 至成就順忍問曰彼經雖說順忍不說是順
 諦忍答曰順忍順諦忍有何差別因論生論
 以何等故名忍言順諦忍暖頂不耶或有說者
 如說忍言順諦暖頂亦應說而不說者當知
 皆是有餘之說復有說者順者言隨順彼忍
 善隨順暖頂不亦復有說者暖法能止緣諦
 增上愚頂止中愚忍止下愚以止身中愚故
 生世第一法復有說者暖法能生緣諦下明
 頂生中明忍生上明以此身中有緣諦明故
 能生世第一法復有說者暖法於陰悅適頂
 法於寶悅適忍法於諦悅適以觀聖諦身中
 悅適故能生世第一法復有說者忍於一切
 時與見道相似如見道一切時惟法念處現
 在前彼忍亦亦暖頂不亦所以者何先修法
 念處後增長三念處展轉現在前是故不相
 似也忍修習法念處惟增長法念處以與見
 道相似故名順諦忍暖頂不亦不名順諦復

有說者忍法側近見道煖頂不亦復有說者忍法亦多相續亦一刹那現在前煖頂惟多相續現在前復有說者忍法惟一定意煖頂不亦復有說者忍法正觀不雜煖頂有雜或時起欲界善根復有說者忍法正觀不多不廣而能隨順趣向涅槃煖頂正觀亦多亦廣亦能隨順趣向涅槃此中應說轉買摩尼寶喻以如是等衆因緣故忍名順諦煖頂不得名順諦是煖頂及下中忍行十六行緣四真諦增上忍行四行緣苦諦復有說者增上忍緣道諦問曰忍為緣何法得正決定答曰或有說言緣於道諦問曰若然者云何不緣行倒錯耶若緣行倒錯云何不為得正決定而作留難答曰假令緣行倒錯於正決定不作留難所以者何於此善根修習緣行先有徑路是以入聖道時於此緣行自在能用如見道中先起欲界忍智道次生有頂忍智道彼有頂忍智道後復還生欲界忍智道觀苦行

後復生觀習行乃至廣說如此皆名緣行倒錯不以緣行倒錯便為見道而作留難何以故以於見道修習緣行先有徑路故忍亦如是於得正決定不作留難諸作是說緣道諦增上忍後得正決定彼有三心應同一緣一行所謂世第一法苦法忍苦法智二心應同一行不同一緣謂苦比忍苦比智二心同於一緣不同一行謂習法忍習法智評曰應作是說應緣苦諦增上忍後得正決定彼見道是猛健善根雖緣行倒錯於正決定而無留難彼忍是世俗有漏善根其性羸劣若緣行倒錯則與見道而作留難如實義者應觀苦增上忍後得正決定非先觀道忍後得正決定增上忍行苦行緣苦而忍方便道廣行十六行緣四真諦彼行者正觀欲界苦觀色無色界苦欲界行集色無色界行集欲界行滅色無色界行滅斷欲界行道斷色無色界行道如是三十二心是名下忍行者後時漸漸

減損行及緣復更正觀欲界苦色無色界苦
乃至觀斷欲界行道除觀斷色無色界行道
從是名中忍復更正觀欲界苦觀色無色界
苦乃至觀色無色界行滅除滅一切道復更
正觀欲界苦色無色界苦乃至觀欲界行滅
除色無色界行滅復更正觀欲界苦乃至觀
色無色界行集除一切滅復更正觀欲界苦
乃至觀欲界行集除色無色界行集復更正
觀欲界苦色無色界苦除一切集復更正觀
欲界苦除色無色界苦復更正觀欲界苦常
相續不斷不遠離如是觀時深生厭患復更
減損但作二心觀於一行如似苦法忍苦法
智如是正觀是名中忍彼復以一心觀欲界
苦是名上忍後次生世第一法世第一法後
次生苦法忍譬如有人欲從己國適於他國
多有財寶及諸生業之具不能持去以此財
物轉以易錢猶嫌其多不能持去以錢易金
猶嫌其多不能持去以金復易多價寶珠持

此寶珠隨其所安往適他國如是行者乃至
漸捨相續不離生於上忍後次生世第一
法世第一法後次生苦法忍論言緣苦忍後
得正決定彼四心頂同一行一緣所謂增上
忍世第一法苦法忍苦法智二心同一行不
同一緣所謂苦比忍苦比智二心同一緣不
同一行所謂集法忍集法智是故如此說者
好問曰世第一法為有上中下不答曰無也
不得一人心中有多人心中乃有如尊者舍
利弗是上目連是中其餘聲聞是下性分亦
有上中下佛為上緣覺為中聲聞為下云何
名頂以何等故名頂尊者瞿沙說曰有二種
達分善根分四一是欲界所謂煖頂二是色界所
謂忍及世第一法欲界中下者是名為煖上
者名頂色界中下者名為忍上者名世第一
法評曰彼不應作是說此盡是色界法是修
法住定地法能行聖行法如是說者好問曰
何以言頂法耶答曰色界善根有動者有不

動者有住不住有難無難有斷不斷有退不退諸彼動者諸不住有難有斷有退者有二下者是煖上者是頂諸彼不動住無難不斷不退者有二下者是忍上者是世第一法復有說者應言下頂所以者何在下煖法頂故復有說者猶如山頂故名爲頂如山頂之道人不入住若無諸難必過此山到於彼山若過諸難即便退還如是行者住頂無久住者若無諸難必到於忍若有諸難還退到煖是以猶如山頂故名爲頂復有說者勝於暖法故名爲頂云何爲頂歡喜於佛法僧生下小信乃至廣說問曰何以故言此信爲下小耶

答曰如尊者瞿沙說此暖頂二達分善根是欲界法故言下小復有說者此住不久停故故言下小復有說者此信當言異信何以故異於色界定地修地行聖行暖法故故名爲異於佛僧生下小信是緣道諦信於法生下小信是緣滅諦信問曰如頂能緣四諦此中

分

五

何以唯說緣二諦信不說緣苦集信耶答曰或有說者此中說名義最勝法故於此四諦何者最勝所謂滅道何以故此二諦清淨無過故復有說者此二諦是妙是離復有說者此二諦能生信處復有說者此二諦有二義一可信二可求復有說者爲生受化者信樂心故若世尊說苦集是可敬信者則無受化者何以故彼受化者當作是念此是煩惱惡行邪見顛倒何可敬信而我等常爲此苦之所逼迫若世尊說滅道是可敬信彼受化者心生欣樂是故滅道最勝可信復有說者此滅道有可信敬事一樂觀在前二無心捨離復有說者信佛信僧說緣道信信法是緣三諦信若如是者則說盡緣四諦信也如說波羅延摩納婆等能於佛法僧生下小信是名頂法彼作經者引經爲證問曰如住頂時亦信陰亦信三寶亦信諦以何等故世尊爲摩納婆等但說信實不說信陰諦耶答曰或有

說者彼摩納婆等非不信苦集諦但不信三寶以不信故故佛為說復有說者彼為苦所困欲求離苦往詣佛所如偈說

為苦所逼諸眾生 不知離苦來詣佛

願示法要除眾患 猶如熱時入涼池

如實能離苦者唯有滅道彼有二義可信一

常樂觀二常喜求復有說者信佛說緣二諦

信信僧說緣道諦信信法說緣滅諦信復有

說者信佛說緣四諦信信僧說緣道諦信信

法說緣三諦信復有說者三寶是生信敬處

是以說之復有說者隨行者意悅適故是以

說之若於陰生悅適是名為煖於寶生悅適

是名為頂於諦生悅適是名為忍問曰如頂

體性是五陰何以世尊為波羅延等以信名

說為諸新學比丘以慧名說答曰或有說者

唯佛世尊決定明解法相亦知所應作事非

餘所及應為眾生而說何法即便說之復有

說者以波羅延等未住所作地未入佛法中

分四

六

未得舍摩他未有漸次聞他天言生信來詣佛所尔時世尊因彼善根欲令增長故以信名說彼諸新學比丘與上相違故即慧名說復有說者隨他乏少為饒益故如波羅延等乏少於信釋種比丘乏少於慧是以波羅延等說信以饒益之釋種比丘說慧饒益之復有說者為止諂曲愚癡意故波羅延等雖復聰明乏少於信無信之慧能增長諂曲是故為波羅延等說信止其諂曲新學比丘釋種出家雖少有信而乏於慧無慧之信增長愚心是故為新學比丘說慧止其愚心復有說者世尊說法受化者二種有利根有鈍根為利根者說信為鈍根者說慧以波羅延等利根故說信新學比丘等鈍根故說慧如利根鈍根內因力外緣力內分力外分力內正觀思惟增益外從他聞法內增益無愚無貪修不修損身見聚處不損身見聚處當知亦如是云何頂法退乃至廣說問曰以何等故說

頂有退不說暖退答曰或有說者如說頂退亦應說暖退而不說者當知皆是有餘之說復有說者行者在頂之時多諸留難有三時諸煩惱業多諸留難如從頂至忍亦時惡道諸煩惱業多作留難所以者何彼諸煩惱而作是念若彼行者已到於忍我復於諸身中當生果報離欲界欲時彼欲界諸煩惱業多作留難所以者何諸煩惱業而作是念若彼行者出於欲界我復於誰身中生於果報離非想非非想處欲時受未來有諸煩惱業多作留難所以者何諸煩惱業而作是念若彼行者離彼欲已更不受身我復於誰身中生於果報行者於此三時多諸留難是故說頂有退不說暖退復有說者行亦時生大憂惱猶如有人見珍寶藏見已歡喜作是思惟我今永斷貧窮根本後欲取時忽然還滅彼人亦時於此寶藏生大憂惱如是行者住頂法時自念不久當得於忍求斷惡道心生歡

喜後便還退生大憂惱復有說者若說頂有退當知亦說暖有退復有說者以頂法不久住故是以有退復有說者欲得忍時大獲重利猶如聖人不墮惡道得忍之時亦復如是如沙門二十億九十一劫不墮惡道與上相違名失重利云何頂退答曰猶如有人親近善知識從其聞法乃至廣說何以復作此論答曰前雖說頂體相未說云何得頂云何失頂今欲說之故作此論猶如有人親近善知識者說親近善友從其聞法者聽隨順方便法內正觀思惟者自身修行正行信佛菩提信善說法信僧清淨功德是說信實說色無常乃至說識無常是說信陰知有苦集滅道是說信諦彼於餘時不親近善知識者親近惡友不從他聞法者不聽隨順方便法不正觀思惟者自身行邪行失此信法是名頂退問曰頂退體相爲是何耶答曰是不成就性不隱沒無記心不相應行行陰所攝復有說

者是不信體性所以者何有信便得無信便失復有說者以何使纏而退頂法即彼使纏性如是說者亦是染汚性復有說者若法隨順退法即是其性若然者一切諸法盡是退性何以故一切諸法與威勢緣故尊者佛陀提婆說曰無所有性是退性強生分別無有

分四

八

相對彼善根和集名頂善根離散名退復有何性猶如有人多諸財物他人劫去後便貧窮人問之言汝今貧窮為是何性彼人答言我本有財他人劫去今唯貧窮當有何性又如有人衣裂他人問言汝今衣裂為是何性彼人答曰衣本完堅今者破裂更有何性又如有人身本著衣人奪其去他人問言汝今裸形無衣為是何性彼人答言我本著衣他人奪去今者裸形無衣當有何性如是行者善根和集之時名之為頂後若離散名之為退當有何性是故無所有性是名退性評曰不應作是說如前說者好頂退是不成就性

不隱沒無記心不相應行行陰所攝問曰如說信佛善提是名信佛乃至廣說以何等故世尊或說信實或說信陰或說信諦答曰或有說者佛於法明了乃至廣說復有說者隨衆生愚處佛隨其所愚而解說之復有說者受佛化者有三種一多疑心二深著於我三

為見所覆為疑者說實為深著我者說陰為見所覆者說諦云何暖法乃至廣說以何等故名暖答曰或有說者智緣境界能生於暖燒煩惱薪猶如火鑽上下相依生火燒薪復有說者以有智知有能生暖智今有萎悴猶如夏時聚華為藉華生暖氣還自萎悴復有

分四

九

說者生依陰在陰智火還燒於陰猶如兩竹相磨生火還燒竹林尊者瞿沙說曰求解脫智火彼最在初如火以烟在初為相無漏智火亦以暖法在先為相如日明相在初為相無漏智日亦以暖在初為相是故名暖云何為暖於正法毗尼中生信愛敬乃至廣說問

曰若然者說於正法毗尼中生信愛敬盡得
暖耶答曰不然何以故暖者乃是色界修地
定地能行聖行所攝於正法毗尼中生信愛
敬者也彼正法者說緣道諦信毗尼者說緣
滅諦信問曰暖能緣四諦何以但說緣滅道
諦信答曰或有說者滅道於諦中最勝故應
如先頂中廣答復有說者滅道是可歸依處
是以故說復有說者正法說緣三諦信毗尼
說緣滅諦信是亦名暖能緣四諦彼作經者
引經為證如說佛告馬師滿宿比丘我有四
句法當為汝說為欲知不當恣汝意二人言
我等今者便為非器何用知為乃至廣說問
曰佛深知彼人不堪受法何故告言當恣汝
意答曰或有說者人謂彼人無教化者所以
若作眾惡而自毀壞是以如來舉手語言我
所應作今已作之而汝自行邪行以自毀壞
非我不教化之過復有說者為止外道誹謗
故所以告言當恣汝意若當如來不告彼者

諸外道等當作是謗云何大悲於弟子眾有
隨順者說法教化不隨順者不說法教化若
當如來告彼人者諸外道等不生誹謗復有
說者為止諸釋不信心故若當如來不告彼
者亦時諸釋生不信心云何悉達不為親族
說法教化心懷嫉妬將慮彼人共已相似若
其如來告彼人者諸釋亦時便更不生不信
之心復有說者彼人自行邪行如來以彼即
為證人而語之言汝本在家及今出家自行
邪行非是我過亦時如來即以軟語面前責
數是故告言當恣汝意復有說者為生彼人
將來善根故佛知彼人而今雖復不能受化
將來必生追悔善根所以者何彼人作是念
彼大悲者恣我意而我不受非如來過能生
如此追悔善根以此緣故必出惡道復有說
者佛知彼人於此命終必生龍中受大苦痛
便作是念我本從何來生此間自知本在佛
法出家次作是念無化我者我今應往作不

利益事破壞佛塔及諸精舍殺諸比丘當於
 亦時佛神力故有如來像當立其前而告之
 言馬師滿宿我有四句之法汝欲知不當知
 今苦是汝等過非我咎也我應作者皆已作
 之而汝今者自為邪行欲止彼龍瞋恚纏故
 令守護佛法是以告言當恣汝意問曰云何
 名四句法答曰或有說者是四諦法何以故
 彼二人以不見諦故造斯惡行復有說者四
 念處是何以故彼二人以顛倒故造斯惡行
 復有說者四正勤是何以故彼二人者多慳
 怠故造斯惡行復有說者四如意足是何以
 故彼二人者不能積集諸善故造斯惡行復
 有說者四聖種是何以故彼二人者貪著利
 養故造斯惡行復有說者四沙門果是何以
 故彼二人者實不得沙門而言我得四沙門
 果故造斯惡行復有說者四善是一善知界
二善知入
三善知緣起四善知處非處也何以故彼二人者愚於因果
 故造斯惡行復有說者如雜阿舍中說偈

分四

十一

賢聖法中善言最 二常愛言遠不愛
 三常實語離虛妄 四常法言遠非法
 是名為四復有說者如增一阿舍所說無貪
 無恚正念正定是名為四彼作是言我今何
 用知是法為世尊告言汝愚癡人遠離我法
 乃至無有少許暖法問曰彼二人者何以作
 如是說我今何用知是法為答曰或有說者
 彼人自知非是法器趣向善道猶為非器况
 趣涅槃當是器也復有說者諸邪惡行在彼
 身中數數犯禁自知此身非是法器瓦石可
 令生牙我今此身終不能生解脫法分復有
 說者彼人已作決定業故復有說者彼人已
 近報果法故彼人惡道報相已現在前乃至
 十指水流而出復有說者佛記彼人當成辟
 支佛菩提彼作是念何煩如來為我說法我
 於現世終不能得入正決定以是等眾因緣
 故彼作是言我今何用知是法為世尊告言
 遠離我法愚癡人於我正法毗尼中乃至無

有少許暖法問曰有衆多毗尼有時毗尼有方毗尼有種性毗尼有家法毗尼有罰罪毗尼有犯毗尼有明毗尼有聖毗尼有欲瞋癡毗尼此中爲說何者毗尼耶答曰或有說者此中說聖毗尼復有說者此中說欲瞋癡毗尼問曰諸不得暖法一切皆與馬師滿宿同

耶答曰不一也衆生凡有三種一有期心二除期心三斷期心有期心者清淨持戒者是也除期心者所作已辦阿羅漢是也斷期心者犯戒者是也以彼無有期心無除期心但有斷期心是以世尊而呵嘖之其餘衆生斷期心者亦與彼同如說乃至無有少許暖法問曰此暖善根最勝微妙住寂靜地今何以言少耶答曰以於達分善根中最是微小故言爲少復有說者以是見聚善根後邊生故故言少許見聚善根者謂安般不淨四念處也此四種善根所謂暖法頂法忍法世第一法名爲達分亦名觀諦亦名修治亦名善根言達分者無漏聖

分四

十二

道是達此善根隨順彼法羽翼彼法是彼法性分故言達分觀諦者以無常等行觀諦察諦故名觀諦修治者爲求聖道及果修治此身除去穢惡欲爲法器猶如農夫爲求子實修治田地除去惡草彼亦如是故名修治言善根者聖道言善涅槃言果此諸法等是彼初基始立之本故名善根問曰此暖等善根有何差別答曰暖法能止緣諦增上愚乃至能止身中愚故生世第一法復有說者暖法能生緣諦下明乃至身中有緣諦明故生世第一法復次暖法能生緣諦下信頂法生中信忍法生上信以身中有此信故能生世第一法復次暖法於陰悅適乃至身中悅適故生世第一法復有說者暖是念處所入處頂是暖法所入處忍是頂法所入處世第一法是忍所入處如是次第無間亦如是尊者瞿沙說曰此善根二是欲界所謂暖頂二是色界所謂忍世第一法評曰不應作是說此是

色界定地修地能行聖行所攝法如是說者
 好問曰暖法有幾種乃至世第一法有幾種
 答曰或有說者暖法有三種謂下下中下
 上頂法有三種中下中中上忍有二種上
 下上中世第一法有一種謂上上此四善根
 以三言之暖是下頂是中忍世第一法是上

分四

十三

復有說者暖有二種謂下下中頂有三種
 謂下上中下中中忍法有三種謂中上上下
 上中世第一法有一種謂上上此善根以三
 言之暖是下頂是下中忍是中上世第一法
 是上尊者瞿沙說曰暖有三種下下中下
 上頂有六種下下乃至中上忍有八種下下
 乃至上中世第一法一種謂上上若以三言
 之暖法一種謂是下頂有二種謂下中忍有
 三種謂下中上世第一法有一種謂上得暖
 法亦捨捨有二種離界地時及退時捨退時
 捨者作無間業能斷善根亦墮惡道復有何
 善利已為涅槃作決定因如吞鈎餌法得頂

法亦捨捨有二種離界地時及退時捨退時
 捨者作無間業亦墮惡道復有何善利更不
 斷善根若然者提婆達多不得頂法耶如偈
 說

無德受供養 是名為凡心
 有善皆忘失 是名為頂退

此偈當云何通答曰此說得退復有說者世
 尊如頂彼以惡心向佛墮於惡道故言頂墮
 得忍亦捨捨有一種離界地時捨彼善根無
 退不作無間業不斷善根復有何善利不墮
 惡道得世第一法亦捨捨有一種離界地時
 捨不退所以者何此善根性是不退不作無
 間業不斷善根不墮惡道復有何善利彼次
 第得正決定復有說者得暖法亦捨捨有二
 種離地界時及退時退時捨者作無間業亦
 墮惡道復有何善利惟不斷善根若然者提
 婆達多不得暖法何以故彼斷善根故得頂
 法亦捨捨有二種離地界時及退時退時捨

者墮惡道復有何善利不作無間業不斷善根得忍亦捨捨有一種離界地時彼善根無退不作無間業不斷善根不墮惡道復有何善利不染著我問曰若然者尸利掘多安仇利摩羅薩遮尼捷子便為不得忍何以故染著我故答曰彼不染著我以論義故言有我

耳問曰彼與如來競諍論我云何乃言不染著我耶答曰彼以不斷我見暫現在前非染著也世第一法得亦捨離界地時捨餘如先說西方人作此論言暖善根有何意趣為何所依有何因緣何法有何果有何依有何報有何善利為行幾行為緣名生為緣義起為是聞慧為是思慧為是修慧為欲界繫為色無色界繫為有覺有觀為無覺有觀為無覺無觀為樂根相應為喜捨根相應為一心為眾多心為退為不退乃至世第一法亦如是問曰暖有何意趣答曰所有布施持戒乃至上忍善根盡以迴向解脫是其意趣為何所

依者依色界定起有何因者於自地前生善根是相似因緣何法者緣四真諦有何果者頂近於暖是功用果有何依者自地相似後生善法是其依果有何報者謂色界五陰有何善利者或有說者是涅槃決定因復有說者不斷善根為行幾行者行十六行為緣名生為緣義生者當言緣義生為是聞思修慧者當言是修慧欲色無色界繫者當言色界繫有覺有觀無覺有觀無覺無觀者當言三行為何根相應者當言三隨所應說為一心為眾多心者當言多心為退不退者當言退忍於頂近者是功用果頂有何善利或有說者不斷善根或有說者不作無間業餘如暖說世第一法於忍近者為功用果忍有何善利有此善利不墮惡道復有說者不染著我亦不退其餘如頂世第一法緣苦苦法忍是功用果世第一法有何善利次第得正決定行四行當言一心不退其餘如忍

生暖法時若苦集道諦現在一法念處未來
 修四念處現在行一行未來修四行取其同
 性非不同性若緣滅諦現在一法念處未來
 修一法念處現在一行未來四行增長暖法
 以下增長中以中增長上時若緣苦集道諦
 現在四念處展轉現在前未來四現在一行
 未來十六若緣滅諦現在法念處未來四現
 在一行未來十六問曰以何等故生暖法時
 未來同性者修非不同性增長暖時未來同
 性不同性修答曰生時以行觀諦未曾得彼
 種而得增長時以行觀諦已曾得彼種而得
 是以具修初生頂時緣苦集滅道現在一法
 念處未來四現在一行未來十六增長時下
 增長中中增長上若緣苦集道諦四念處展
 轉現在前未來四現在一行未來十六若緣
 滅諦現在一法念處未來四現在一行未來
 十六初生忍及增長時現在一法念處未來
 四現在一行未來十六尊者瞿沙說曰初忍

時若緣苦集道諦現在一法念處未來四現
 在一行未來四同性終不異性若緣滅諦現
 在一法念處未來亦一法念處現在一行未
 來四同性修不異性若增長時緣苦集道諦
 四念處展轉現在前未來四現在一行未來
 十六若緣滅諦現在一法念處未來四現在
 一行未來十六評曰彼不應作是說如前說
 者好

十六末

阿毗曇毗婆沙論卷第四

分四

倒錯上音到下徑路上居逼迫上彼力反鈍
徒因保形或上音果反火鑽下子反菱悴下音伯反積
反子智鈞餌下古侯反安仇下音